



## DAGING AWIG-AWIG

MURDHA CITTA .....	1
SARGA I      ARAN LAN WEWIDANGAN DESA .....	1
SARGA II     PATITIS LAN PAMIKUKUH .....	2
SARGA III    SUKERTA TATA PAKRAMAN .....	3
Palet 1 Indik Krama lan Warga .....	3
Palet 2 Indik Prajuru .....	7
Palet 3 Indik Banjar .....	9
Palet 4 Indik Paruman .....	11
Palet 5 Indik Kukul .....	13
Palet 6 Indik Druwen Desa .....	14
Palet 7 Sukerta Pamitegep .....	15
SARGA IV     SUKERTA TATA AGAMA .....	21
Palet 1 Indik Dewa Yadnya .....	21
Palet 2 Indik Rsi Yadnya .....	27
Palet 3 Indik Pitra Yadnya .....	28
Palet 4 Indik Manusa Yadnya .....	31
Palet 5 Indik Bhuta Yadnya .....	32
SARGA V      SUKERTA TATA PAWONGAN .....	34
Palet 1 Indik Pawiwahan .....	34
Palet 2 Indik Nyepihan lan Balu .....	37
Palet 3 Indik Sentana .....	39
Palet 4 Indik Warisan.....	42

SARGA VI	WICARA LAN PAMIDANDA .....	44
	Palet 1 Indik Wicara .....	44
	Palet 2 Indik Parnidanda .....	45
SARGA VII	ANGUWAH-NGUWAHIN AWIG-AWIG .....	46
SARGA VIII	PAMUPUT .....	47

## MURDHA - CITTA

Om. Awighnamastu nama sidham,

Putusing pasebhan Krama Desa Adat Kapal, indik gumawe Awig-awig Desa Pakraman maka sepat siku-siku pameneh wastu kasidan prayojanan mami kabeh, prasama angidep mwah amanggehaken kadi linghing awig-awig iki.-

### S A R G A I ARAN LAN WEWIDANGAN DESA

#### Pawos 1

1. Desa puniki mawasta Desa Adat Kapal
2. Jebar kakuwub wewidanganya nyatur :
  - ha. Sisi Wetan Desa Adat Anggungan lan Adat Lukluk mapanenger telabah Pahan Siat
  - na. Sisi Kulon Desa Adat Beringkit Gede lan Desa Adat Kekeran mapanenger nganggo Tukad Penet, wates lan Tukad Yeh Sauh.
  - ca. Sisi Lor Desa Adat Penarungan lan Adat Babakan mapanenger nganggo Setra Penarungan
  - ra. Sisi Kidul Desa Adat Semate mapanenger antuk wates, Desa Adat Abianbase lan Desa Adat Tangeb mapanenger antuk Bedugul
3. Desa puniki kawangun antuk Tanah Karang Ayahan Desa utawi karang bhukti, turmaning kaepah dados 18 (pelekutus) Banjar Adat.  
Iwire :
  1. Banjar Adat Panglan Baleran.
  2. Banjar Adat Panglan Delodan.
  3. Banjar Adat Celuk.
  4. Banjar Adat Uma.
  5. Banjar Adat Cepaka.
  6. Banjar Adat Basangtamiang.

7. Banjar Adat Titih.
8. Banjar Adat Pemebetan.
9. Banjar Adat Ganggasari.
10. Banjar Adat Peken Baleran.
11. Banjar Adat Peken Delodan.
12. Banjar Adat Muncan.
13. Banjar Adat Tambaksari.
14. Banjar Adat Langon.
15. Banjar Adat Gegadon.
16. Banjar Adat Belulang.
17. Banjar Adat Tegalsaat Baleran.
18. Banjar Adat Tegalsaat Delodan.

SARGA II  
PATITIS LAN PAMIKUKUH

Pawos 2

Desa Adat Kapal ngamanggehang pamikukuh minakadi :

ha. Pancasila ;

na. Undang-undang Dasar 1945 pamekas Pasal 18 ;

ca. Tri Hita Karana manut sada cara Agama Hindu ;

ra. Undang-Undang No. 32 tahun 2004, tentang otonomi daerah pasal 1, ayat 9.

Pawos 3

Lwir patitis Desa Adat Kapal :

ha. Mikukuhin miwah ngrajegang Sang Hyang Agama ;

na. Nginggilang tata prawertine magama ;

ca. Ngrajegang sukertan Desa saha pawonganya sekala kalawan niskala.

SARGA III  
SUKERTA TATA PAKRAMAN  
PALET 1  
INDIK KRAMA LAN WARGA

Pawos 4

1. Sane sinanggeh krama, inggih punika kulawarga sane magama Hindu saha ngemong Tanah Karang Ayahan Desa Adat Kapal utawi tanah bhukti, sampun marabian tur katedunang mabanjar, wiadin kulawarga sane sareng nyungsung Kahyangan Desa Adat Kapal.
2. Sane kabawos warga, sahananing kulawarga sane mawiwit saking krama.
3. Sajaba punika sinanggeh tamiu.

Pawos 5

Krama Desa wenten 3(tigang) soroh lwire :

- ha. Krama ngarep, kulawarga sane ngamong Tanah Karang Ayahan Desa Adat Kapal, utawi karang bhukti ring sakuwub pawidangan Desa Adat Kapal.
- na. Krama panyade, kulawarga mawiwit saking krama Ngarep sane nyarengin ngamong Tanah Karang Ayahan.
- ca. Krama Suksukan, kulawarga saking dura desa, sadurungnyane nenten wenten paiketan saking krama Desa Adat Kapal.

Pawos 6

Krama Desa taler kaepah manut linggih :

- ha. Krama jangkep, kulawarga sane kantun jangkep alaki-arabi.

na. Krama balu.

Pawos 7

Ngawit dados krama Desa mawiwit antuk :

ha. Ngamong Tanah Karang Ayahan Desa, utawi tanah bhukti ri pawidangan  
Desa Adat Kapal.

na. Sangkaning jumenek mapumahan tur ngrereh pangupajiwa ring sajroning  
palemahan Desa Adat Kapal,

ca. Malarapan antuk pawiwahan.

Pawos 8

Panamayan tedun makrama Desa :

ha. Risampune mawiwaha tur sampun katedunang makrama Banjar.

Pawos 9

Sahanan warga Desa sami keni tetegenan (ayah-ayahan) makadi ring sor  
puniki:

ha. Ayah Ngarep, saking Krama ngarep.

na. Ayah Balu, saking Krama balu.

ca. Ayah Roban saking krama dandanan waris aksara ha, na, inucap ring ajeng  
sane sampun munggah daha teruna, mayusha sakirang-kirang ipun 17  
(pitulas) warsha

Pawos 10

Gung alit tetegenan warga Desa makadi ring sor puniki :

ha. Krama ngarep keni ayah-ayahan miwah papeson jangkep.

na. Krama suksukan keni ayah-ayahan jangkep, papeson jangke

ca. Krama balu keni ayah-ayahan lan papeson sakadi ring sor puniki :

- Balu Ngelisting ngawa wiadin ngemong Tanah Karang Ayahan Desa keni aparo
- Balu Makrambean, keni jangkep yan sampun ayahnya jangkep.
- Balu Ngempu, keni ayah miwah papeson aparo.
- Daha lan Taruna Tua ngemong Tanah Karang Ayahan, ayahan lan papeson keni aparo.

#### Pawos 11

Swadharmaning Warga miwah Krama, sewosan ring ayah-ayahan inucap, patut:

- ha. Dreda atuang ring Desa.
- na. Tinut saturut ring sadaging Awig-awig, Pararem miwah Paswara Desa.
- ca. Tan maren ngutsahayang mangda Desane prasida nyujur manut patitis.

#### Pawos 12

Swadharma lan olih-olihan tamiu :

- ba. Tamiu sane jumenek ring sajroning Desa Adat Kapal patut masadok ring prajuru Banjar, sakirang-kirang ipun adina sasampune wenten ring Desa Adat Kapal, malarapan antuk ilikita pastika.
- na. Tinut ring tetiwak desane ngupadi pasukertan sakala.
- ca. Tan tiwal ring sapamargin desane.
- Ra. Ngamolihan pasayuban sakala, makadi : anyud, katiben abing lan sapanunggilannya.

#### Pawos 13

Patias (olih-olihan) Krama Desa makadi ring sor puniki :

- ha. Polih pasayuban sakala lan niskala.

- Sakala** : manawita katiban kalabu-baang, makadi umah puun, anyud, katiban abing lan sapanunggilanya tur kabawosang sahananing wicaranya lan katiwakin pamutus manut ring wewenang Prajuru Desa Adat.
- Niskala** : rikala nangun yadnya polih pamargi-sawigatiannyane marep ring Kahyangan sane kasungsong antuk Desa, makadi tirtha, setra lan sapanunggilanya.

na. Nyarengin paruman Desa, saha wenang mastikayang pamutus.

ca. kengin mapuangkid, nyada, nyuksukin, luput, mogpog, numbas ayah manut paetangan, makadi ring sor :

1. Mapuangkid : ngaluputin ayah-ayahan Desa, manawita sedek mayadnya, matepeting wong lara, malaluasan lan sapanunggilanya.
2. Nyada : ngamademang ayah-ayahan lan papeson riantukan sampun wenten panyade, utawi lanjut yusa wiadin pinunas ngraga (sungkan-sungkanan).
3. Nyuksukin : nyilihdiyinin ayah.
4. Mogpog : ngetut ayah saha papeson antuk artha brana.
5. Meli ayah : ngentos ayah antuk artha brana malarapan antuk kajudi ring sang mawangrat wiadin malaluasan sakidik ipun 6 (nem) sasih.

#### Pawos 14

Wusan dados Krama Desa :

ha. Sangkaning pinunas ngraga, manawita kesah kadura Desa.

na. Kanorayang, dwaning sampun tan kaprasidha ngesehin solah maprawerti satata mamurug kecaping awig-awig.

Sang wusan makrama :

- Patut ngaturang Tanah Karang A)
- Tan polih pah-pahan padruwen De

PALET 2  
INDIK PRAJURU  
Pawos 15

1. Desa Adat Kapal kaenter antuk Kelihan Desa Adat.
2. Kelihan Desa Adat kasanggra olih :
  - ha. Patajuh Kelihan Desa Adat.
  - na. Panyarikan pinaka juru ilikita.
  - ca. Petengen Desa pinaka pangemong sadruwen Desa.
  - ra. Kasinoman pinaka juru arah.
  - ka. Kelihan Banjar Adat ring soang-soang Banjar.
3. Sewosan ring panyanggra inucap, Kelihan Desa taler kasade antuk :

ha. Sakancan panglinsir Desa, ngranjing taler sahananing Kelihan Desa sane sampun wusan sangkaning rahajeng, sane wenang micayang piteket miwah pangeling-cling sewosan marep ring Kelihan Desa. Punika sami kawastanin Sesepuh Desa. Sesepuh Desa punika kajudi antuk Krama Desa nganutin pararem (tata-tita nyeje).

na. Kerta Desa Sabha, inggih punika panyade Kelihan Desa rikalaning jagi mowosin wicara sane mabuat ; akwehnya 9 (sanga) diri. Kerta Desa Sabha puniki kajudi olih Krama Desa manut pararem (tata-tita nyeje).

ca. Upadesa Sabha : genah Kelihan Desa jagi nunas tatimbangan, saking sang sane sampun kajanawikan ring salah sinunggal pawidangan. Sang kajudi ngalenggahin Upadesa Sabha punika manut ring pararem Prajuru Desa (ilikita nyeje).

#### Pawos 16

Sane wenang kaadegang Kelihan Desa, inggih punika :

ha. Mawiwit saking Krama.

na. Mayusha sakirang-kirang ipun 40 (petang dasa) warsha, sampun marabian

ca. Cacep ring aksara Bali lan Latin.

ra. Sanistan ipun wruh ring kecaping sastra Agama.

ka. Tatas ring Awig-awig miwah dresta Desa Adat Kapal.

da. Madruwe tata susila sastra dresta (Agama Hindu), makadi tan naen nglaksanayang gamya-gamana lan sapanunggilanya, tur nenten naen lempas ring Dasar Negara.

#### Pawos 17

Tata-cara ngadegang Prajuru :

ha. Kelihan Desa kajudi olih Krama Desa Adat, manut pararem, tata-tita nyeje.

na. Patajuh Kelihan Desa Adat, Panyarikan, Patengen lan Kasinoman kajudi olih Kelihan Desa Adat, tur kacumponin madasar antuk paruman Desa.

ca. Sesepuh Desa, Kerta Desa Sabha lan Upadesa Sabha, kajudi manut kecaping pawos 15, 3., ha, na, ca, ring ajeng.

ra. Sahananing Prajuru, sadereng ngamargiang swadharmanya patut matur piuning nunas panugrahan ring Pura kahyangan Tiga, manut tata-cara lan dresta.

- ka. Prajuru kaanggehang masengker 5 (limang) caka-warsha.
- da. Prajuru sane sampun puput sengkernya kengin kapilih malih apisan.

Pawos 18

Swadharmaning Prajuru Desa lwiripun :

- ha. Ngenterang sadaging Awig-awig, Pararem miwah Paswara Desa.
- na. Nuntun tur Ngenterang Krama rawuhing warga Desa nyujur patitis.
- ca. Nuntun saha nodya tata-cara miwah panyangaskaraning kauripan mabuat sajroning pakilit sulur pakulawargan.
- ra. Maka Duta Desa matemuang bawos ring sapisira ugi.
- ka. Mawosin tur niwakin pamutus marep ring wicara krama lan warga Desa.
- da. Nglaksanayang swadharma sewosan sane kapica saking Sang Mawangrat.

Pawos 19

Patias utawi olih-olihan Prajuru Desa :

- ha. Luput ayah-ayahan ring Banjar.
- na. Luput papeson ring Desa nganutin pangunadikan.
- ca. Polih dana dharma manut pararem.
- ra. Polih patias sewosan manut pararem.

Pawos 20

1. Prajuru kagentosin riantukan :

- ha. Seda. Sajroning kirang ring duang tiban tengah warsha patut kawentenang paruman nyeje. Sakewanten yan sampun lintang ring kalih tengah warsha wenang Patajuh kaanggehang Pjs. Kelihan Desa.

*Ata Paru ...  
Masa ... (Sampun ...)*

- na. Sampun manut sengkernya.
  - ca. Sangkaning pinunas ngraga, tur kapatutang olih paruman Desa.
  - ra. Tilar ring swadharmanya.
  - ka. Kanorayang.
2. Ngentosin Prajuru mangda sajroning paruman tur kararemin antuk Krama Desa.
  3. Prajuru sane tilar ring swadharmanya lan sane kanorayang tan kengin kawaliang malih dados Prajuru.

PALET 3  
INDIK BANJAR  
Pawos 21

1. Banjar inggih punika pahan Desa Adat, pinaka genah Krama Desa matemuang wirasa, madasar antuk salunglung sabayantaka, paras-paros sarpanaya, dumogi prasida nyujur ring patitis Desa.
2. Jimbar wewidangan Banjar punika manut dresta.
3. Tetujon Banjar lwire :
  - ha. Tan maren mapitulung ring Krama sane nangun Yadnya, suka lan duka.
  - na. Mapitulung ring Krama sane katiben pancabhaya.
  - ca. Nglaksanayang sahananing pamutus Desa.

Pawos 22

Banjar wenang ngardi Awig-awig, sakewanten patut nganutin bantang ring Awig-awig Desa. Sane patut kaunggahang sajroning Awig-awig Banjar punika, wantah sulur pasuka-dukan sajroning pakraman.

Pawos 23

Daging Awig-awig Banjar tan kengin tungkas ring Awig-awig Desa.

Pawos 24

Banjar tan wenang nganorayang Krama, sadurunge polih wara lugraha saking Desa, sakewanten wenang nyepekan masengker laminipun 3 (tigang) sasih.

Pawos 25

Banjar dados ngwilangin kanti ring Banjar sewos. Wicara Banjar marep ring Banjar sewos, katanganin olih Kelihan Desa.

Pawos 26

Banjar dados kaepah manut tempekan. Yan kaadegang Banjar anyar, dyastu Banjare sane lami wyadin Banjare sane anyar, kapatut Kramannyane sakirang kirangnya 40 diri (manut paparem).

PALET 4

INDIK PARUMAN

Pawos 27

1. Paruman Krama Desa Adat Kapal wenten 4 (petang) soroh, inggih punika :
  - ha. Paruman Desa.
  - na. Paruman Banjar.
  - ca. Paruman Prajuru utawi Pamucuk-pamucuk Desa.
  - ra. Paruman Sekaa-Sekaa sane sampun kasungkemin olih Krama Banjar.

2. Paruman Desa kawentenang nemoning :
  1. Padgatakala manut kawigunanya.
  2. Awarsha apisan tepengan ngembak geni, masengker awuku.
3. Paruman Banjar manut pararem soang-soang utawi asasih apisan.
4. Paruman Prajuru kawentenang :
  1. Asasih apisan
  2. Padgatakala manut kawigunanya.
5. Paruman Sekaa-Sekaa kawentenang asasih apisan, lan padgatakala manut kawigunanya.

Pawos 28

Sahanan paruman utawi sangkepan manut dudonan sakadi ring sor puniki :

1. Prasadha lumaksana ri sampun katedunin antuk sang ngamiletin, maduluran swaran kulkul saha bhusana nyelempot utawi bhusana alit tur tan kengin makta gagawan sakalwire miwah nganutin genah, saha cane.
2. Tan maren ngarcana ring Ida Bagawan Panyarikan maka sarana Widhi wedana, cane.
3. Pamutus kautsahayang mangda sagilik-saguluk.

Pawos 29

1. Sajroning paruman Prajuru, patut nyiarang pamarginya pamekas ring sor puniki :
  1. Munjuk lungsuring pakraman sakadi ayah-ayahan, sulur artha brana druwen Desa miwah selantur ipun.
  2. Sahanan wicara saha pamutusnya lsp.
  3. Pangrencana utawi pidabdab Prajuru nganinin usaha kapungkur.
2. Sahanan sane kasiarang ring ajeng, katitenin saha katiwakin pamutus antuk paruman.

Pawos 30

1. Paruman Prajuru Desa wantah ngrincikang tata-upaya, nglaksanayang usaha pawangunan sakala niskala. kadi ring sor :
  - ha. Ngwangun ring Desa sane patut druwen Desa.
  - na. Ngwangun utawi mecikang Kabhyangan Tiga lan Pura panyiwian Desa.
  - ca. Nitenin kalih mecikang margi druwen Desa lan rurung.
  - ra. Nitenin pamargin palaba Desa.
  - ka. Miara telajakan desa.
  - da. Nitenin pawatesan karang paguyuban, rurung, jalan druwen Desa.
2. Ngutsahayang nyade Sang mawangrat jagi nglaksanayang kawicaksanan wewangunan sakala lawan niskala.
3. Miara Sekaa-sekaa pasantian lan sapanunggilnya sane wenten sajroning Desa.
4. Miara pawangunan suci sewosan sane kawawa antuk pemaksan masarana dana punia (manut pararem).

PALET 5

INDIK KULKUL

Pawos 31

1. Kulkul ring Desa Adat Kapal wenten 4 (petang) soroh :
  1. Kulkul Pura, sane magenah ring sajroning Pura makadi ta Pura Desa lan Pura Puseh miwah Pura Dalem miwah Pura Purusada sane kabawos gendongan.
  2. Kulkul Banjar, magenah ring soang-soang Bale Banjar.
  3. Kulkul Sekaa-Sekaa, magenah ring Bale Banjar.
  4. Kulkul Sekaa sewosan, magenah manut pararem Sekaa.

2. Tabuh lan tetepakan kulkul Pura, Banjar, pastika masewosan.

Tetujon ipun lwire :

1. Kulkul Pura katepak rikala odalan utawi padgatakala rikala kawentenang pasangkepan Pemaksan Pura.
2. Kulkul Banjar katepak nganutin tetenger mekadi ring sor puniki :
  1. Ping pisan, tetengeran wenten Krama sane ngamedalang putra utawi rare.
  2. Ping kalih banban, tetengeran wenten Krama kalih warga sane ngrangkat utawi ngorod.
  3. Ping tiga banban, tetengeran wenten salah sinunggal sane kalayon/seda.
  4. Bulus ngelantur, tetengeran wenten geni bhaya, anyud, tete abing.
  5. Bulus mapanggal tigang tulud, cihna wenten jiwa bhaya, risampune sida karya, cihna puniki patut katut malih, ngangge swaran kulkul tabuh banban alon.
  6. Ngompang banban, cihna wenten patirtan utawi bulan kepangan.
  7. Ngompang sadagangsar, cihna wenten linuh.

Pawos 32

1. Sane wenang nepak kulkul wantah prajurunya, wiadin salah sinunggal warga, sane kajudi olih prajuru inucap.
2. Prade wenten swaran kulkul cihna kapancabhaya, saking salah sinunggal Banjar sajroning Desa Adat Kapal, Banjar sewosan bilih-bilih Banjar sane prakanti, patut digelis nyawurin tur sinamian krama mangda medal, makta gagawan anut ring rupan pancabhayanya

3. Kukul Sekaa tan wenang matehin sukat swaran kukul banjar.

PALET 6  
INDIK DRUWEN DESA  
Pawos 33

Desa Adat Kapal padruwenya sakadi ring sor puniki :

1. Kahyangan Desa lan pawangunan sajangkep ipun, makadi panyacah sane munggah ring unkur.
2. Tanah sawah, tanah tegalan, tanah karang ayahan, tanah setra, taler munggah makadi panyacah ring unkur.
3. LPD. Desa Kapal.
4. Yayasan Swastika Kapal.
5. Tanah genah Wantilan.
6. Gedung B.K.I.A. sejangkep ipun.
7. Gedung SMP Swastika Kapal lan genahnya.
8. Tanah SD No. 1 Kapal
9. Tanah Kantor Kelurahan Kapal.
10. Pasar Desa Adat Kapal.
11. Miwah sane lian-lianan sakadi munggah ring unkur.

Pawos 34

Palaba Pura marupa tanah lan tegalan, pamuponnya, wantah kaangge pamupenya, minakadi mecikang pura, piodalan ring pura padruwen Desa. Tanah-tanah palaba punika tan kengin : kaadol, kagentosin, kasilurang utawi kasandayang, sajawaning sampun polih pararem Krama Desa sajabag Desa Adat Kapal.

Pawos 35

Olih-olihan saking usaha LPD Desa Kapal kengin kaanggen ngupadi pasukertan jagat sakala niskala. Olih-olihan saking usaha Yayasan Swastika Kapal wantah prasida kaanggonngulati nincapang kapradnyanan lan usaha sewosan manut tatujon Yayasan.

Pawos 36

Usaha lan olih-olihan sane munggah ring pawos 35 ring ajeng wenang kaetangang antuk Prajuru Desa pamekasnya Patengen Desa tur nyabran sangkepan Desa patut kasiarang unjuk lungsur padruwen Desa, ngangge ilikita pastika, sakirang-kirangnya 3 (tigang) sasih apisan.

PALET 7

SUKERTA PAMITEGEP

Pawos 37

Indik Karang Ayahan :

1. Sane kabawos karang ayahan, inggih punika sahananing tegak paumahan, manut tattwaning Tri Mandhala, sane kawengku antuk Desa Adat Kapal.
2. Krama sane ngemong utawi negakin karang ayahan Desa patut ngaturang ayah-ayahan ka Desa manut dudonan. *mung karang bhukti lung we widangan lan adat*
3. Ngemong utawi negakin karang ayahan Desa lan karang bhukti prasida kaolih, antuk :
  1. Pawarisan, inggih punika, krama sane ngentosin linggih wong tua utawi kaluhuranya.

2. Paweweh, inggih punika krama sane ngemong tanah karang ayahan Desa olih saking krama sewos, manawita malantaran tresna sangkaning tulung tinulung.

3. Numbas papayon, inggih punika, krama sane ngemong karang ayahan Desa, sangkaning numbas pepayonan, krama sewos, sane mentik sajroning karang ayahan punika.

*Numbas Karang Ayahan Desa utawi Karang Ekti  
(Manut Pararim)*

Pawos 38 74

Krama sane ngemong karang ayahan yening kawigatian mabuat dados ngadol pepayonan sajroning karang ayahan punika, wantah sangkaning :

1. 1. Nyejerang linggih Sanghyang Agama, manut Agama Hindu.
  2. Katiben lara gering.
  3. Ngulati kawruhan.
2. Krama inucap patut kantun madruwe genah pasayuban manut dresta.

Pawos 39 75

Sahananing karang ayahan Desa, krama pangemong patut miara sepatutnya, nagingin pawatesan sane pastika, ngelingang gegaleng kaja lan kangin, madaging pamedalan sane pastika. Yening wenten karang kabobong, Ikrama sane nyanding karang ayahan punika patut nyadya ngwehin tegak rurung, majalaran antuk dharmatula utawi dana, *pat macek kang Projoan Ora.*

Pawos 40 76

Indik tegalan lan sawah patut ngelingang gegaleng kateben inggih punika Kelod lan Kawuh utawi kagenahe sane lebahan. Pawatesanya kengin ngangge Pal KPT.

## Marga lan Rurung :

1. Sahananing marga lan rurung Desa Adat Kapal, sane tan kasangkreb antuk sang mawangrat sinanggeh druwen Desa.
2. Gung rurung lan marga inucap jaga kautsahayang jebar ipun sakirang-kirangnya; rurung, adepa agung, marga, duang depa agung (3m).
3. Krama sane ngayahan karang ayahan sane ngadin rurung kalih marga inucap, patut miara rurung kalih marga inucap, resik telajakan.

## Warga Desa Adat Kapal. tan wenang :

1. Ngalah-alah tanah palaba Pura, marga, rurung, tegal, carik, tukad, tegak Kahyangan, setra.
2. Ngembahang toya mawiwit saking badan wewalungan, pasiraman utawi kakus, lan pawaregan kategak karang paumahan krama sewosan utawi kamargine lan karurunge.
3. Ngutang wangken wewalungan katelabahe utawi kapekarangan warga sewos, kamargine lan karurunge.
4. Ngutang sahananing luhu, mangda kakutang ring tanah karang ayahan soang-soang, wyadin ring genah PANGUTANGAN.
5. Mabacin ring karang krama sewos, ring marga, ring rurung, bilih-bilih ring genah sane sinanggeh suci.

## Indik Pepayonan.

1. Pepayonan punika wenten kalih soroh, inggih punika :

ha. Tanem tuwuh, minakadi : jaka, kelapa, nangka, dagdag engse, lsp  
na. Tetaneman paumahan, minakadi : sela, kacang-kacangan, bunga-  
bungaan lsp.

2. Tan wenang :

ha. Nandur pepayonan tanem tuwuh kirangan ring adepa agung ngajroang  
saking wates karang, tembok utawi pagehan.

na. Asapunika ugi tanem tuwuh sane sida antuk nyeta jagi mayanin  
wewangunan krama sewos.

ca. Pepayonan mentik sajroning wates karang ; yening jantos dados wicara,  
pepayonan punika wenang kerampag ngranjing dados druwen Desa  
utawi Banjar.

ra. Pepayonan ngelintangin wates karang.

3. Prade wenten sakadi angka 2. inucap ring ajeng, pengadinya sane mrasa tan  
anut ring kayun, patut ngwarah rumiyin ring sang madruwe taru, akwehnya  
ping 3 sajroning 9 rahinan, prade taler dereng kaebah utawi katortor,  
wenang nyadokang ring Prajuru Banjar utawi Desa mangdene sang  
madruwe taru digelis melaksana. Yening manut pawilangan Prajuru, taru  
punika manut sakadi pangedih sang masadok, sajroning 7 rahina sesampune  
Prajuru mapica pituduh taler taru punika durung kaebah, pangadin sane  
tan anut ring kayun wenang ngebah, kasaksiang olih Prajuru. Sesampune  
kawentenang paetangan dana pangebahnya, taru bah-bahan punika  
kaepah tiga, asiki katur ring Prajuru, kekalih kapare antuk sane madruwe  
lan pangadinya.

4. Taru sane ngrubuhin wewangunan krama sewos, yening sampun kawarah,  
Ikrama sane karubuhin, wenang ngrampag taru punika tur sang madruwe  
taru patut mecikang wewangunan sane rusak tur keni panyangaskara  
sanistanya marupa prayascita jangkep.

Indik Wewangunan.

1. Wewangunan ring sajroning tanah karang ayahan Desa Adat Kapal patut :
  - ha. Ngangge paetangan Asta Bhumi miwah gegulak Asta Kosala-kosali, sakirang-kirangnya anut ring patitis Agama Hindu lan dresta.
  - na. Nenten dados nyayubin kapisaga, asapunika ugi rawuh ring toyan capcapanya, tan kengin nibanin karang pangadin miwah kamargine utawi karurunge.
  
2. Ngawangun ring tepi wates patut asiku (60cm) saking wates, bilih-bilih mepet wates, patut ngawentenang paigum rumiyin ring Prajuru Banjar wyadin Desa, yening mamurug, riwekas prade kawarah olih panyadinya, wewangunan inucap patut kagubar antuk sang madruwe saha tan polih prabia kapocolan.
  
3. Krama sane jagi ngawangun, sadurunge, mangda masadok ring Prajuru Banjar wyadin Desa. Sadurunge polih uak-uakan tan wenang ngawangun. Sahananing wewangunan patut nganutin uger-uger sang mawangrat.

Pawos 44

Indik Wewalungan :

1. Warga Desa sane madruwe, miara wewalungan patut sayaga nitenin, negul utawi ngelogor mangda tan jantos ngerusak karang wyadin pabyanan warga sewosan, bilih-bilih jantos ngeletehin genah suci.
2. Prade wenten sane lempas makadi kecap angka 1. ring ajeng, sang katiben pakewuh, patut mlungguh ring sang madruwe wewalungan, ngraris masadok ring Prajuru Banjar wyadin Desa, mangda katiwakin pamidandanya.

Pawos 45

Tan wenang nganggon ring :

1. Palemahan karang suci, makadi pura, setra lan sapanunggilannya.
2. Pundukan sane sawahnyane madaging pantun utawi pamulan.
3. Tegal pabyanan krama sewos.
4. margi utawi tepin margi sane kawawa antuk Desa lan sane kawawa antuk sang mawangrat.

Pawos 46

Prade krama ngecundukang wewalungan sane ngrusak, tur tan wenten sane mariangken nruwenang wenang ketaban antuk sang katiben. Sang naban wewalungan punika patut :

1. Masadok ring Prajuru Banjar utawi Desa, selantur ipun Prajuru patut nureksain wewalungan punika, tur kasiarang ring Bebanjaran.
2. Miara wewalungan punika sepatut ipun.
3. Ngelantur nyadokang malih painedikannya ring sang mawangrat.

Sang madruwe wewalungan sang kataban punika, patut :

1. Nawur prabea karusakan tetenduran, upah miara wewalungan punika ring sang naban, manut panglokika Prajuru Banjar utawi Desa.
2. Yening sajroning 30 rahina, taler tan wenten sane ngangkenin, wewalungan punika dados druwen sang naban.

Pawos 47

Prade wenten wewalungan sane ngamuk dyastun ring umah wyadin ring margine, bilih-bilih mayanin wong akweh, wewalungan inucap wenang patenin.

Pawos 48

Indik Bhaya :

Wilangan bhaya punika wenten 5 (limang) soroh, sane kabawos pancabhaya

lwire :

1. Jiwa bhaya : makadi kapet matinya, kabaak, sehanan laku sane manawi sida ngepet urip.
2. Artha bhaya : makdi kapandangan, kamalingan.
3. Geni bhaya : makadi umah puun, katunuan.
4. Er bhaya : makadi balabar agung.
5. Duracara ring Agama : makadi melaksana sane tan patut ring genah suci wyadin ring pura.

Pawos 49

Sapa sira ugi sane manggihin, ngacundukin pancabhaya, patut :

1. Siaga digelis ngulkul utawi masadok ring Prajuru.
2. Yening sang malaku mayanin punika, side kagambel, mangda katur ring Prajuru Banjar utawi Desa, selantur ipun katur ring sang mawangrat.

Pawos 50

Sapa sira ugi sane melaksana duracara ring Agama, dyastu ring sajroning Desa Adat Kapal, wyadin dura Desa, dyastu ipun krama Desa Adat Kapal wyadin nenten, lyanan ring keni uger-uger tetepekan sang mawangrat, taler keni panyangaskara, manut pararem Desa. Nanging yening Krama Desa Adat Kapal melaksana ring dura Desa, Kelihan Desa sane katiben bhaya patut nunas uak-uakan saking Prajuru Desa Adat Kapal.

SARGA IV  
SUKERTA TATA AGAMA  
PALET 1  
INDIK DEWA YADNYA  
Pawos 51

1. Sane kaanggehang Kahyangan Desa, inggih punika :
  1. Kahyangan Tiga : ha. Pura Desa-Puseh lan sahanan palinggih sane wenten sajroning pura inucap.
    - na. Pura Dhalem : ha. Pura Dhalem Gede.
      - na. Pura Dhalem Gunung.
      - Ca. Pura Dhalem Dukuh.
      - ra. Pura Dhalem Panglan.
      - ka. Pura Dhalem Bebajangan.
  2. Pura Purusada.
  3. Pura Taman Suci
  4. Pura Beji Langon.
  5. Pura Melanting.
  6. Pura Margatiga.
  
2. Pura Kahyangan Desa inucap ring ajeng, kasungkemin antuk krama Desa, sakadi panyacah puniki :
  - ha. Pura Desa-Puseh saha sahanan palinggih sane wenten sajroning pawidangan punika, Pura Purusada, Pura Margatiga, Pura Taman Suci lan Dhalem Bebajangan, kasungkemin olih Krama Desa Adat Kapal.
  - na. Pura Dhalem Gede, Pura Dhalem Gunung, Pura Dhalem Dukuh lan Pura Dhalem Panglan kasungkemin olih Krama Desa Adat Kapal manut dresta.

ca. Pura Beji Langon lan Pura Melanting, kaayomin olih Krama Desa Adat Kapal tur polih dana punia saking Desa Adat Kapal.

Pawos 52

Sewosan ring Kahyangan Desa inucap ring ajeng, wenten taler panembahan utawi Paryangan papeletan, makadi : Dadia, Paibon, Pamrajan, sanggah miwah Pura pemaksan.

Parahyangan inucap kasungsung utawi kasungkemin olih pamaksannya soang-soang, yadyastu magenah ring sajroning Kahyangan Desa.

Pawos 53

1. Ring soang-soang Pura inucap ring ajeng kawentenang utawi kaadegang Pamangku.
2. Ngadegang Pamangku tata caranya manut sakadi ring sor :
  1. Nyanjan utawi nunas pawuwus.
  2. Waris Pamangku.
  3. Pilihan saking krama manut pararem.
3. Tan wenang kaadegang Pamangku, wong sane :
  1. Ceda Angga, lwire : peceng, perot, cungh.
  2. Ngalap rabhi wong istri sapian
  3. Kagrangan, lwire : sakit ila, ayan, buduh lsp.
  4. Miwah sane lian-lianan malih manut pararem Desa, sakewanten yah keni cuntaka utawi ceda angga, kengin kamanggehang sajroning sampun kaadegang Pamangku, kengin kamanggehang salami nyidayang ngamargiang swadharmanya.
4. Prabeya ngadegang Pamangku Kahyangan Desa lanang lan istri, miwah rawuh sedanya riwekas, upakarnya ngangge byakerti saha panilemanya ngangge upakara Trisandhi, kasungkemin antuk krama Desa.

Pawos 54

Swadharmaning Pamangku Kahyangan Desa sakadi ring sor puniki :

1. Ngaturang piodalan ring Kahyangan Tiga Desa utawi ring soang-soang paumahan krama.
2. Ngaturang panauran, asing-asing krama Desa, wyadin wong dura Desa, sane pacang mapanawuran.
3. Nitenin tur nuntun kasucian Kahyangan.
4. Tan wenang, ngamargiang swadharma kacuntakan; mangbang, ngardi pamuwunan, negen layon.
5. Tan wenang rawuh ring pakubon sang lampus.
6. Tan wenang muputang upacara pitra yadnya

Pawos 55

Pamangku Kahyangan Tiga wenang :

1. Muputan Yadnya nista miwah madhya.
2. Nibakan panugrahan ring Pamangku sanak miwah krama Desa.
3. Polih panampa, manawita salah sinunggal, wargan dane Pamangku seda.
4. Polih panyepuhan, manawita Pamangku katiben sepung, nanging tan kabukten kaiwanganya.

Pawos 56

Tetegenan Pamangku Kahyangan Desa lwire :

1. Ngaryaning aturan, nemonin Purnama, Tilem, Kliwon, rerahinan alit.
2. Nitenin miwah miara pralingga lan panganggen Pura soang-soang.
3. Sadok ring Prajuru Desa prade wenten sane patut kagentosin utawi kawentenang.

Pawos 57

Patias olih-olihan Pamangku Kahyangan Desa lwire :

1. Sarin canang, sarin panawuran ( manut pararem).
2. Luput ayah-ayahan, kakenan lan papeson ring Desa utawi luput manuk.
3. Sari tahun saking krama Subak sane katur ke Kahyangan Desa, tepengan puniki Pura Desa-Puseh, sane pahpahanya manut pararem.
4. Punia Desa marupa bhusana jangkep nangken 2 (kalih) warsha.
5. Para Pamangku druwen Desa, patut taler kapikayunin olih-olihannya manut pararem.

Pawos 58

Pamangku kagentosan, riatukan :

1. Seda utawi lampus.
2. Kanorayang manawita nilar sasana, melaksana astha dustha utawi anayub cor.
3. Sangkaning pinunas ngraga, manawita sangkaning kagringan lsp.
4. Kacihnan sampun marabyan jangkep, malih ngalap rabi, patut mararyan rumiyin masengker 42 rahina, yan sampun nyuciang raga sareng rabinya anyar, antuk prabeya ngraga, wenang nglaksanayang swadharmanya malih. Nanging yan Pamangku inucap balu, prabeya panyucianya kamedalang saking Desa.
5. Ngalab rabhi wong istri sapian.

Pawos 59

Ring Pura Kahyangan Desa, pamekas ipun Pura Desa lan Pura Sada, Jro Pamangku nglaksanayang swadharmanya kasangggra antuk "Parekan" inggih punika kulawarga sane sangkaning turun temurun parek ring Ida Bhatara, manawita malarapan antuk stiti bhakti ring Widhi. Wilangan parekan inucap akwehnya :

ha. Parekan Pura Desa akwehnya 18 kulawarga.

na. Parekan Pura Sada akwehnya 27 kulawarga

Manut kecaping Awig-awig iki "Parekan" punika kaadegang lan kaanggehang kawentenanya.

#### Pawos 60

Swadharmaning Parekan Pura :

1. Nyanggra Pamangku rikala ngenterang piodalan utawi upacara sewosan.
2. Miara keasrian utawi kasucian Pura, makadi palinggih, wastra, tedung, ilen-ilen sewosan lsp.
3. Makena wastra, tedung lan ilen-ilen sewosan rikala piodalan utawi upacara sewosan.
4. Mundut lan ngiring Ida Bhatara ka segara rikala melasti, asapunika ugi ritakala Ida Bhatara malelungan nilar joga, kasade antuk krama Desa.
5. Patias parekan Pura, patch makadi Pamangku sane inucap ring pawos 57 ring ajeng.

#### Pawos 61

Indik Kasukertan Kahyangan :

Tan kalugra ngranjing ka Kahyangan Desa miwah genah suci sewosan, sapisira ugi sane :

1. Keni kalayonan , inggih punika ngawit saking wenten swaran kulkul kacuntakan, jantos 3 (tigang) rahina sesampune palebon utawi ngutangan. Upacara panunas thirta, kalugra rawuh ring jaba utawi jaba tengah, sawawaning ring Pura Prajapati lan Pura Dhalem kengin ngranjing kajroan. Sang kacuntakan salaminya sadurung ngamargiang upakara makakelud.
2. Keni sebel raga : Wong istri ngraja swala, ngamedalang rare, jantos ngawentenang upakara pabresihan raga, miwah sebel pangantenan, jantos ngawentenang upakara pabyakalan.

3. Keni patita : Wong istri mobot nanging tan wenten sane ngangkenin, jantos ngawentenang upakara panglukatan, wong sakit ila, buduh, ayan lsp.
4. Karuron : Wong istri karuron jantos sengker 42 rahina saha sampun ngamargiang upakara pabresihan.

Sato geng minakadi bawi, banteng, kuda, kebo lsp, sajawaning rikala mapapada, asupunika taler sarana letuh makadi rah, rambut, galih jadma lsp. Tan kalugra ngranjing

Pawos 62

Tan kalugra sajroning Pura malaksana makadi ring sor puniki :

Mabacin, mawarih, mecikang wastra, ngambahang rambut, mabawos kasar, mayudha, masanggama, makolem masikian lanang istri, kakobetan, munggah tedun palinggih, sajawaning saking pituduh Pamangku, ngamargiang thirta, sajawaning pituduh Pamangku, munggah tedhun tembok panyengker.

Pawos 63

Tata kramaning ngranjing ka Pura patut nganggehang makadi ring sor puniki :

1. Rikala piodalan utawi pathirtan :

Lanang = mawastra sane sampurna, madestar tur makampuh utawi bhusana adat madya (nganutin tatacara bhusana agama Hindu).

Istri = mawastra sane sampurna, masesentong utawi bhusana adat madya (nganutin tatacara bhusana agama Hindu).

2. Rikala makarya ring Pura :

Lanang = mawastra tur maslempot utawi bhusana adat alit.

Istri = mawastra tur masesenteng utawi bhusana adat alit.

3. Sapasira ugi jagi muspa mangda, makta piranti pamuspan sajangkepa.

Pawos 64

Tan keni cuntaka utawi sebel sangkaning kalayon, inggih punika :  
Pamangku Kahyang Tiga, Kelihan Desa, sajawaning sang seda madruwe sulur  
rah asiki utawi sang seda manatar asiki.

PALET 2  
INDIK RSI YADNYA

Pawos 65

1. Sang sane pacang mapudgala, saderege ngamargiang upakara patut polih lugraha saking sang mawangrat, pamekasipun Dinah Agama Hindu utawi Parisadha Hindu Dharma lan Kelihan Desa, madedasar ilikita pastika.
2. Prajuru inucap patut sareng nureksain utawi nitenin, mangda sulur kalih pamarginya, yukti-yukti manut kecaping Agama, saha sareng nyaksinin upakara lan upacaranya.
3. Sapupute pamargin upakara inucap, prajuru Desa Patut digelis nyiarang parab sang diniksa, antuk sahanan ilikita nganinin bhiseka kawikon, manut panugrahan nabanya.

Pawos 66

1. Sajawaning Pamangku, sang jagi mawinten riantuk pacang nglarang pamargin sonteng, dalang lsp. sane wenten pakilitanya ring yadnya, patut masadok ring Kelihan Desa.
2. Kelihan Desa patut nureksain lan nitenin, tur wenang naweng, yan prade sarasar ring kecaping Agama.

3. Yening sampun manut, Kelihan Desa sareng nyaksiang upakara lan upacaranya salanturnya lan nyiarang ring paruman Desa, tegep rawuh kawenanganya.

PALET 3  
INDIK PITRA YADNYA  
Pawos 67

Pamargin sang lampus manut kawentenan nista, madya lan utamaning upakara, kalaksanayang kadi ring sor puniki :

1. Mapendem.

- Mapendem : ha. Mapendem alit  
na. Mapendem mabekel.
- Mageseng : ha. Makingsan digeni.  
na. Sawa prateka.  
ca. Nywasta, pranawa utawi ngwangun.

Pawos 68

Krama sane madruwe kalayonan ring Desa Adat Kapal, patut rumiyin masadok ring Prajuru Banjar, ngraris nunas atiwa-tiwa pamargi pangutangan ring Prajuru Desa.

Pawos 69

1. Makutang tan kalugra ring rahina :

- ha. Purnama Tilem.  
na. Rikala linggih pathirtan ring Kahyangan Tiga lan rahina rerainan gumi.  
ca. Manut dresta.

2. Pakutangan sajroning 7 (pitung) rahina sane nenten kabawos nganca dewasa, wenang ngangge upakara sakasidhan. Lintangan ring 7 (pitung) rahina, sajawaning pituduh Prajuru Desa, manawita sangkaning wenten kapiulangan sewos, kabawos nganca dewasa. Indike asapuniki upakaranya patut ngangge yadnya utama.
3. Krama Desa sane madruwe kalayonan yan prasidha ugi mangda mageseng upakara alit, sane ketah kabawos "Pangabenan Parisadha".

Pawos 70

Sawa sane sampun mapendem, yening jagi kaupakara malih ngangge upakara pangabenan, sawa inucap tan wenang kagagah ; pamargin upakaranya wenang ngangge swasta, pranawa utawi ngwangun.

Pawos 71

1. Kelihan Desa yan wenten sane mabuat, wenang mituduhin genah pangutangan ring setra sajroning Desa Adat Kapal.
2. Rare sane kantun maudel lan sane durung mauntu tur durung mayusa 3 (tigang) sasih, patut kapendem pramangkin tan ngetang dewasa, ring setra Bebajangan utawi ulun setra ageng, nanging tan wenang ngangge upakara pangabenan. pakelinge ka Dhalem Bebajangan.
3. Sawa sane sampun mayusa 3 (tigang) sasih, gumentos yusa durung ketus untu, wenang kapendem ring setra geng nganutin atiwa-tiwa, sakewanten wantah dados kaprateka ngangge upakara pangabenan nglungah.
4. Sane sampun ketus untu mayusha 5 warsha lan selantur ipun patut kaupakara sapatuta.

Pawos 72

Krama kadadosang nglaksanayang pangabenan nglanus, nanging mangda manut ring dudonan, tepet panamayanya, jangkep upakara, tegap pangemba tur pamarginya trepti.

Pawos 73

1. Sane wenang kaprateka ring setra ageng druwen Desa Adat Kapal inggih punika Krama utawi Warga Desa Adat Kapal. Krama utawi Warga saking dura Desa sane magama Hindu taler kengin nanging keni batu-batu manut pararem.
2. Papendeman sane marupa wewangunan "kuburan" tan kengin lintangan ring awarsa.

Pawos 74

Kadadosang nginepang bang-bang utawi pamalungan adina kewanten, nanging ngangge upakara pangentos.

Pawos 75

1. Tan wenang mendem utawi ngeseng sawa lan pangacak-acak ring sajroning karang paumahan.
2. Taler tan kalugra ngenahang, makta utawi nyimpen sarana, sane kabawos ngeletehin karang paumahan, pamrajan lsp.

Pawos 76

1. Yening wenteng pangutangan langkungan ring asawa, sane tampek setra patut mamargi rumiyin.
2. Pamargin pangutangan mangda trepti tan dados gora, bilih-bilih ngrusak sawa, ngeraryanin sawa ring sajroning pamargi.

Pawos 77

Krama sane kalayonang, saking Banjar patut polih gebagan, patis, lan ngambil sesebelan manut pararem Banjar.

Pawos 78

Risampun puput upacara pangabenan, yan prasidha ugi antuk, sajroning 42 rahina ngawentenang upakara mamukur utawi panileman, gung alit manut nista, madya, utama. Wekasan mangda sang pitara kaunggahang ring sanggah utawi mrajan kamulan.

Pawos 79

1. Prade lampus sangkaning salah pati, werat pati, ngulah pati, kabangawan, kengin kabakta budal tur kaprateka sapatutnya, risampun kaupakara antuk upacara banten panebusan lanpangulapan.
2. Sang lampus sangkaning sakit ila, gering agung lsp. risampune kaupakara manut angka 1. ring ajeng, kengin kapendem ring setra ageng.
3. Prade sinilih tunggil wenten krama ngrebang kaluarga manut angka 2. ring ajeng, sadereng sang kegeringan lampus patut kasadokang ring Prajuru tur katambanin antuk Dokter, mangdane gering inucap nenten ngalahlah.
4. Sawa daha taruna, kapatut ngangge rurub putih kuning.
5. Prade wenten wong istri lampus ngadut manik, tan wenang kapendem utawi kageseng, sadurung bobotanya embas.
6. Prade wenten wong lampus ring pakarangan, tegalan sawah, patut sang madrebe sawa mrayascita genah inucap.

PALET 4  
INDIK MANUSA YADNYA  
Pawos 80

Sane kabawos Manusa Yadnya inggih punika, Upacara-upacara dharmaning manusa, ngawit saking sajroning garba jantos lampus riwekas.

Pawos 81

1. Dudonan upacara manusa yadnya inucap makadi ring sor puniki :
  1. Magedong-gedongan.
  2. Rare medal.
  3. Kepus udel.
  4. Ngelepas aon (12 rahina).
  5. Tutug kambuhan (42 rahina).
  6. Nigang sasihan (105 rahina), karuntutin upacara mapetik
  7. Ngotonin (6 sasih).
  8. Tutug kelih (ngraja swala utawi ngembakin).
  9. Matatah utawi mapandes.
  10. Mawiwaha utawi nganten.
  11. Mawinten.
2. Upacara inucap manut kecaping Agama lan dresta kengin kelaksanayang upakaranya nista, Madhya, utama.

PALET 5  
INDIK BHUTA YADNYA  
Pawos 82

1. Sane kabawos bhuta yadnya inggih punika upacara-upacara pabyakalan, katur ring Prethiwi, Kahyangan, sarwa prani, saha upacara-upacara ring babhutan sewosan.

2. Upacara-upacara ring sarwa prani lwir ipun :

1. Ring sarwa tumuwuh, rikala Tumpek Pengatag utawi Saniscara Kliwon Wariga.
2. Ring sarwa ingon-ingon, rikala Tumpek Andang utawi Saniscara Kliwon Uye.
3. Ring manusa, upacara pakala-kalan, manut kagunanya, ketah kabawos pabyakalan.

3. Upacara katur ring pratiwi, Kahyangan miwah babhutan kawastaning caru.

4. Caru inucap ring ajeng, nista, madhya lan utama manut kagunanya makadi ring sor puniki :

1. Eka Sata, masarana antuk ayam asiki .
2. Panca Sata.
3. Rsi Gana.
4. Panca Kelud.
5. Panca Sanak.
6. Tawur Kasanga.
7. Panca Durgha.

5. Sajawaning yadnya ring ajeng, kawentenang yadnya sesa, inggih punika ngejot nyabran wusan ngrateng.

Pawos 83

Indik Pacaruan Tawur Kasanga.

1. Nyabran ngentosin warsa Içaka, Krama Desa Adat Kapal patut nangun yadnya marupa pacaruan jagat, ketah kabawos Tawur kasangan.
2. Pidabdab pamarginya manut dudonan makadi ring sor puniki :
  1. Panglong ping roras ka sanga ; Ida Bhatara Bhatari, lunga ka Bale Agung.
  2. Panglong ping telulas ; Ida Bhatara Bhatari malasti ka Sagara.

3. Panglong ping patbelas ; Ida Bhatara Bhatari nyejer ring Bale Agung.
  4. Ring Tilem ka Sangan ; Ida Bhatara Bhatari nodya upacara Tawur ka Sanga.
  5. Sasampune upacara Tawur ka Sanga inucap puput, raris Ida Bhatara Bhatari mapasaran wusan punika Ida Bhatara Bhatari budal ka joga soang-soang.
3. Risampunya pamargin pacaruan ring soang-soang Banjar lan paumahan puput mamargi ngraris kalanturang antuk ngrupuk, pinaka nogtog Penyepian benjangnya.
  4. Pacaruan manut etangan Prajuru Desa madadasar antuk pituduh saking Parisadha Hindu Dharma lan Dinas Agama Hindu.
  5. Tatacara Pangrupukan manut pituduh Prajuru Desa utawi Banjar kasiarang ring Krama Desa nyabran warsa.

Pawos 84

1. Rikala rahina nyepi sinamian Krama utawi Warga Desa Adat Kapal patut ngamargiang Catur Brata Panyepian, makadi ring sor puniki :
  1. Amati Geni : tan kalugra mapi-api sajawaning sang sane ;  
 ha. Madruwe rare dereng mayusa 3 sasih.  
 na. Matepetin anak sungkan.  
 ca. kalayuan ring genah sawa.  
 ra. Nglaksanayang Yadnya.
  2. Amati Karya : tan wenang nyambut karya.
  3. Amati Lalungan : tan kengin malalungan sajawaning sane polih uak-uakan Prajuru Desa, ngangge ilikita pastika.

4. Amati Lelanguan: tan dados maswara gora, maplalian lan sapanunggilanya.
2. Benjanganya (penanggal ping kalih), kawastaning ngembak geni, mapiteges panglukaran yoga samadi kadulurin antuk ngaksama (maaf-memaafkan) soang-soang krama, maka cihna pangawit Içaka warsha.

SARGA V  
SUKERTA TATA PAWONGAN  
PALET 1  
INDIK PAWIWAHAN  
Pawos 85

1. Pawiwahan inggih punika, patemon lanang kalawan istra malarapan panunggalan kayun, jagi nyikiang raga alaki rabi, maduluran upasaksi sakala lan niskala.
2. Pawiwahan punika manut rupanya wenten 3 (tigang) soroh :
  1. Papadikan inggih punika, pawiwahan sane kamanggala antuk kulawarga madasar antuk suka-rena kulawarga istri lan lanang.
  2. Ngrorod inggih punika, sang lanang lan sang istri malarapan suka-rena ngrangkat rumiyin saking umahnya soang-soang, nyujur tongos pasiliban, raris kulawarga sang lanang, nunas pangaksama ring kulawarga sang istri.
  3. Nyeburin inggih punika, pawiwahan sane kamanggala antuk kulawarga sang istri, ngidih sang lanang maka panglantur pretisentana purusa saking kulawarga sang istri.
3. Ring Desa Adat Kapal, yan bilih kangkat pawiwahan nyeburin tan langkungan ring apisan.

Pawos 86

Sahananing pawiwahan patut nganutin Undang-undang No. 1 Tahun 1974 saha P. P. No. 9 Tahun 1975, miwah-miwah paswara sewosan sane kamedalang antuk sang mawangrat.

Pawos 87

Pawiwahan sane kapatut ring Desa Adat Kapal, kaciha antuk :

1. Pawidhi wedana sanistanya pabyakalan, padengan-dengen, sanistane kamargiang antuk balian sonteng, sane keanggehang antuk Prajuru Desa sakadi pawos 66.
2. Kasaksinin antuk kula warganya.
3. Kasaksinin antuk Prajuru Desa lan Banjar, pamekas ipun manut ring pituduh sang mawangrat.
4. Selantur ipun kapatutang ngarereh ilikita marupa Surat Akta Perkawinan.

Pawos 88

Tan wenang nglaksanayang pawiwahan, inggih punika :

1. Durung manggeh daha truna manut Undang-undang ; lanange durung mayusa 19 warsa, istrine durung 16 warsa.
2. Anut ring pasal 8 Undang-undang No. 1 Th. 1974 manut ayat ha raweh da makadi gamyagamana.
3. Natab upakara sangkaning kapaksa.
4. Salah sinunggal sang jaga mawiwaha tan rawuh miwah tan wenten ilikita.
5. Nenten wenten saksi lan ilikita.

Pawos 89

Piteges pawiwahan, patut sang lanang marabi adiri, asapunika taler sang istri marabi adiri, sajawaning pasubaya pawilangan sewosan.

Pawos 90

1. Pawiwahan sane mamargi malarapa antuk ngrorod, patut nglaksanayang uger-uger, makadi ring sor puniki :
  1. Risampune lanang lan istri punika ngrangkat, digelis sang madruwe lanange masadok ring Prajuru Desa utawi Banjar sang istri, maduluran ilikita lanang lan istri.
  2. Iprajuru ngrawuhang ring sang madruwe daha, mari tatasang pamargin dahanya.
  3. Sang madruwe daha wenang natasang pamargin dahanya nanging patut sadok rumiyin tur kasade antuk Prajuru Banjar lanange.
  4. Sadurunge 3 (tigang) rahina yan tan wenten kapiulangan punapa-punapi, dahane patut polih swaran kulkul, taler yan sampun galang, sadurunge 3 (tigang) rahina lugra nywarayang kulkul.
  5. Risampune wenten swaran kulkul, sang madruwe lanange digelis patut ngecub. Tatujon ipun nunas galah makruna ring kulawarga dahane.
2. Puput jangkep upakara pawiwahan kacihna antuk kulawarga lanang makta jauman marep ring kulawarga istrine. Upakara inucap patut kasaksinin antuk Prajuru Banjar saking lanang lan istri.

Pawos 91

Sapa-sira ugi sane mabukti mamitra ngalang, dratikrama, mwang paradara, kedanda manut pawos wicara lan danda.

PALET 2

INDIK NYAPIHAN LAN BALU

Pawos 92

1. Pawiwahan sida wusan malarapan antuk palas marabian utawi padem.

2. Wusan marabian riantukan sinalih tunggil lampus mapiteges balu.
3. Palas marabian wenten sangkaning lila cita utawi wiwit wicara, mapiteges nyapihan.

Pawos 93

Dasar-dasar sane manggeh prasida nyapihang manut kecaping pasal 19, P. P. No. 9 Th 1975 mabuat kadi ring sor :

1. Salah sinunggal mamitra, mabuk, madat, mamotoh lsp.
2. Salah sinunggal minggal kanoranya tan pasamadana sajroning kalih warsa.
3. Salah sinunggal kapanjara 5 warsa utawi langkung.
4. Salah sinunggal malaku ngapakrama.
5. Salah sinunggal ceda angga, utawi keni pinakit gumanti tan prasida ngamargiang swadharmaning alaki-arabi.
6. Sajroning alaki-arabi tan maren metu wicara.

Pawos 94

Tatacara palas marabian sangkaning pada lila sakadi ring sor puniki :

1. Nawur prabeya pasaksi sinalih tunggil pada matenga.
2. Pagunakayan polih pahan pada.
3. Pabekel, tadtadan soang-soang, kakuasa niri-niri, nanging warisan kakuasa antuk purusa.
4. Nincapang pangawruh miwah ngupajiwana pretisentana manut swadharmaning guru rupaka.
5. Nawur pamidanda panumbas swaran kulkul manut pararem Banjar soang-soang.

Pawos 95

Prade riwekasan sang palas kacihnan adung malih, patut :

1. Ngalaksanayang pawiwahan malih anut pawos 87 ring ajeng.

2. Keni pamidanda panumbas pada lila. Pamarginya inucap kabawos tulak-wali.

Pawos 96

1. Balu kabinayang dados 2 (kalih) soroh :
  1. Balu luh wit sentana rajeg, miwah balu luh boya sentana.
  2. Balu muani kapurusan, miwah balu muani nyeburin, boya sentana.
2. Swadharmaning balu inucap patut :
  1. Ngamanggehang pati-brata, tan kengin ngamargiang paradara utawi dratikrama.
  2. Ngwasayang waris pagunakayan, tan kengin ngadol, ngadeang, makidihang, sajawaning polih kabebasan saking pianak utawi pakulawargan ipun, prade pianake kantun alit-alit.
  3. Kawenangan mawiwaha malih, prade sampun polih paigum saking pianak daha taruna utawi keluarga kapurusan, tur prasida ngupajiwa sentana.

Pawos 97

Sapa-sira ugi sane jagi nglaksanayang utawi mapikayun nyapihang, mangda atur upeksa ring sang mawangrat.

PALET 3  
INDIK SENTANA

Pawos 98

1. Sentana punika wenten 2 (kalih) soroh, inggih punika :
  1. Pratisentana : sentana sane mijil malarapan antuk pawiwahan, teges ipun metu saking swadharmaning alaki-arabi.

2. Sentana paperasan :sentana sane mawiwit saking idih-idihan madadasar antuk upasaksi sakala lan niskala ; manawita sangkaning alaki-arabi inucap tan prasida ngawetuang putra utawi putri.
2. Pratisentana utawi sentana paperasan, kawenanganya kaanggehang pateh.
3. Krama sane sampun madruwe sentana lanang makadi pratisentana utawi sentana paperasan tan kapatut malih ngalih sentana paperasan lanang.
4. Kapatut ngidih sentana paperasan, lintangan ring adiri yening lanang lan istri, utawi istri-istri.

Pawos 99

Tata ngedih sentana paperasan, inggih punika :

1. Sang ngidih patut atur upeksa ring Prajuru Desa utawi Banjar, nguningang sapariindik karsanya jagi ngidih sentana paperasan, masengker sakirang-kirangnya 3 (tigang) sasih sadurunge amalaku.
2. I prajuru sane nampi babawosan, digelis nyiarang ring sawewengkon Desa utawi Banjar, manawita wenten krama sane nenten arsa ring kayun, mangdane taler digelis sadok ring Prajuru, saha ngaturang dasar-dasar pakewuhnya utawi tan arsanya.
3. Nyabran paruman Banjar mangda Kelihan Banjar nakenin pari indik ngidih sentana paperasan inucap, manawita wenten sane tan arsa. Yening sampun 3 (tigang) paruman taler tan wenten, kaanggehang sampun putus. Pakewuh utawi kasungsutan sasampune galah inucap, manggeh Awig-awig iki tan katrima
4. Prade wenten krama sane tan arsa ring ngidih sentana paperasan inucap, Prajuru Desa (Kertha Desa) digelis mawosin tur micayang pamutus manut catur Dresta Desa miwah pararem.

Pawos 100

Sang sane dados kaangkat sentana paperasan palarapan antuk ngidih patut nyulurang dedudonang makadi ring sor puniki :

1. Rare utawi jadmā magama Hindu.
2. Mangda kautsahayang saking purusa, yan tan prasida, kengin saking pradana, taler tan prasida kalugra saka wenang.
3. Sang kaangkat lawan sang ngangkat sentana paperasan, macihna tresna-asihnya sakala, kabukten saking lampahnya sadina-dina.
4. Iwih becik, yening kaangkat rikala kantong rare.

Pawos 101

Risampune sang ngangkat sentana paprasan polih lugraha saking Prajuru Desa, pamargin upakaranya patut makadi ring sor puniki :

1. Widhi wedana banten pamrasan jangkep.
2. Ngulihang toyan susu ring byangnya masrana antuk artha-brana.
3. Kasaksinin antuk Prajuru Desa utawi Banjar, sane patut nureksain, nitenin apacara inucap. Sasampune puput mamargi digelis kailikitang.

Pawos 102

1. Krama sane nenten ngamijilang sentana lanang pinaka panerus pancer kapurusanya, wenang nyudi salah sinunggal sentana wadon, sane kaanggehang pratisentana. Puniki kawastanin sentana rajeg.
2. Sentana rajeg wawu jangkep kawenanganya, yening sampun mabuat :
  1. Sampun kaanggehang dados pratisentana lanang.
  2. Pawiwahannya kaceburin.

3. Sane kaanggehang patut sadokang ring Prajuru Desa utawi Banjar mangdane kasiarang ring paruman Banjar.

Pawos 103

1. Sane kabawos tilar ring sasanan putra lan sasanan rarama ring sajroning sentana paprasan, inggih punika yan salah sinunggil masalah :
  1. Ngapakrama, minakadin ipun ngabayang-bayang, bilih-bilih jantos mayanin jiwa.
  2. Ngarohara, inggih punika tan piara-kapiara, bilih-bilih salah sinunggal kagringan lsp.
  3. Matilar saking paumahan tan pasamadana sajroning kalih warsa utawi langkung.
2. Krama sane katiben wenang sadok ring Prajuru Desa utawi Banjar mangda wicaranya kabawosin tur kaicen pamutus.

Pawos 104

1. Wong kantun daha truna wyadin daha tua lan truna tua tan wenang ngangkat sentana.
2. Balu nglintisting wenang ngangkat sentana, nanging mangda nganutin pawos 101 ring ajeng.

PALET 4  
INDIK WARISAN

Pawos 105

1. Sane kabawos warisan, inggih punika sahananing tetamian, dyastu ipun marupa artha-brana wyadin nenten marupa artha-brana saha ayah-ayahan sane sidha anggen ngupadi sukertha sekala-niskala, mawiwit saking kaluwuranya arep ring katurunnanya.
2. Sinanggeh warisan lwire :
  - ha. Dwe tengah utawi DT, makadi tegal, sawah, tanah karang ayahan Desa, Kahyangan.

na. Pamrajan Kamulan.

ca. Pagunakayan, tadtadan utawi jiwa-dana, utang-utang.

ra. Swadharma sang pawaris arep ring pakula warganya

3. Wawu kengin kabawos warisan, prade wenten :

ha. Sang ngwarisang.

na. Sang ngwarisin.

ca. Artha-brana sane marupa wyadin nenten marupa, miwah tetegenan utawi ayah-ayahan maka cihna warisan.

#### Pawos 106

1. Sang sane dados ngwarisin :

ha. Pratisentana purusa.

na. Pratisentana pradana (sentana rajeg).

2. Prade tan wenten sakadi ring angka 1. ring ajeng, sane wenang ngwarisin :

ha. Turunan purusa ngunggahang : rerama lanang, pekak.

na. Turunan purusa pernah kesamping : sameton, misan, mindon.

#### Pawos 107

Swadharmaning ngwarisin :

1. Nrima saha ngwasayang tetamian saking kaluhuranya, sakadi ngremponin sanggah, pura saha pangupakaranya, pinaka nylediyinin ayah-ayahan sang ngwarisang.

2. Ngabenang sang ngwarisang saha nglanturang upacara upakara Pitra Yadnya jantos sang ngwarisang sida munggah ring sanggar kamulan.

3. Nawur utang-utang sang ngwarisang, sane marupa artha-brana, mwah nglaksanayang swadharma sewosan, makadi muputang Manusa Yadnya lwire matatah, nyakapang, pianak sang ngwarisang.

Pah-pahan warisan, manut sakadi ring sor puniki :

1. Risampun kalaksanayang Pitra Yadnya lan utang-utang sang ngwarisang sida katawur sami, sang ngwarisin polih pah-pahan pateh sane mawiwit saking pagunakayan sang ngwarisang, (tanah karang ayahan Desa tan wenang kaepah manut pah-pahan wewarisan, lajer kaemong antuk kramam ngarep).
2. Tan polih pah-pahan utawi pah-pahan pateh :
  - ha. Waris sane nilar sasananing Agama lan Kawitan manawita sangkaning malebet Agama sewos.
  - na. Alpaka Guru Rupaka.
  - ca. Sentana rajeg kesah mawiwaha utawi pratisentana nyeburin ninggal kedaton.
3. Tan wenang ngwarisin muponin upon-upon anut dudonan :
  - ha. Sentana luh salami dereng kesah mawiwaha.
  - na. Sentana sane mijil sangkaning sentana luh, tan wenten sane ngangken bobotanya, linggihnya pateh makadi ibyang, dyastu kawekas katilar mawiwaha antuk byangnya.
  - ca. Balu luh utawi balu lanang nyeburin.
  - ra. Muang daha utawi taruna, mapiteges antuk saksi sekala niskala.

1. Tatacara nglaksanayang pah-pahan warisan :
  1. Patut kawentenang paiguman indik pah-pahan warisan inucap.
  2. Yan tan sidha polih paigum, dados tunasang tatimbang ring Prajuru Desa.
  3. Prade taler tan wenten cumpu ring tetimbang Prajuru Desa kengin katunasang pamutus ring sang rumawos.

2. Yening wenten tanah karang ayahan putung, sane kaanggehang wenang ngayahin inggih punika :
  1. Waris sane kabawos ring pawos 106 angka 2 ring ajeng.
  2. Yening sang ngwarisin angka 1 ring ajeng taler tan wenten tanah karang ayahan inucap mawali ka Desa. Selantur ipun ayahan punika, mangdane kapiayang ring krama sane sampun seksek, manut ring pararem Banjar inucap.

S A R G A VI

WICARA LAN PAMIDANDA

PALET 1

INDIK WICARA

Pawos 110

1. Sane wenang mawosin sahananing wicara ring Desa Adat Kapal, inggih punika Kelihan Desa Adat Kapal kasade antuk Kerta Desa Sabha.
2. Ring soang-soang Banjar, Kelihan Adat Banjar kasade antuk Kelihan Dinas utawi Kepala lingkungan.

Pawos 111

Wicara punika lwire :

1. Wicara sane metu saking laksana mamurug daging Awig-awig, pararem, paswara Desa wyadin Banjar. Wicara puniki patut digelis kabawosang, tan nyantos pasadok.
2. Wicara sane metu sangkaning bebuatan krama. Tatacaran ipun, inggih punika : wicara puniki mangdane katureksain olih Prajuru Banjar. Risampune tatas, wawu kengin kaunggehang ka Prajuru Desa.

Pawos 112

Panepas utawi pamutus Desa, patut pastika nyantenang iwang-patut, madedasar sepat siku-siku Awig-awig, pararem Desa malarapan Tri Pramana (saksi, ilikita, bukti) miwah tan maren nepek ring catur dresta.

Pawos 113

1. Prade wenten wicara sane tan prasida katepasin, riantukan tuna Tri Pramananya (ilikita, bukti lan saksi), kapatutannya kengin kaanggehang malarapan antuk anayub sumpah, makadi macoran kalih madewa saksi.
2. Sapa-sira ugi sane jagi nglaksanayang anayub sumpah, patut polih uak-uakan saking Kelihan Desa.

PALET 2

INDIK PAMIDANDA

Pawos 114

1. Krama utawi warga Desa asapunika ugi, sapa sira sane lempas utawi mamurug sadaging Awig-awig puniki, kabawos sisip. Dwaning asapunika patut kapidanda.
2. Gung alit pamidandanya. manut gung alit kasisipanya.
3. Pamidanda punika wenten 5 (limang) soroh, inggih punika :
  1. Nunas pangampura arep ring Desa, Banjar wyadin krama sane katiben.
  2. Danda artha.

3. Panyangaskara marupa upakara prayascitha, biyakawon, caru, lsp.
  4. Kasepekang : kalenggahang linggih lan kawenanganya ring sajroning pakrama Banjar utawi Desa, masengker 3 (tigang) sasih.
  5. Kanorayang : kauwusang dados krama utawi warga ring Desa Adat Kapal.
4. sane wenang niwakang pamidanda sasampune wicara inucap kaputus olih kerta Desa Sabha, wantah Kelihan Desa kewanten.

S A R G A VII  
ANGUWAH -NGUWAHIN AWIG-AWIG

Pawos 115

1. Nguwah-nguwahin Awig-awig puniki madasar saking pinunas Prajuru Banjar utawi Desa, niri-niri utawi sinarengan. Pinunas inucap kabawosang ring sajroning paruman Prajuru Desa. Yening pinunas punika wyakti janten mabuat, nguwah-nguwahin daging Awig-awig puniki kalaksanayang ring sajroning paruman Desa.
2. Awig-awig puniki lumaksana ngawit kararemin olih Krama Desa Adat Kapal lan kapasupati ring Kahyangan Desa.

Pawos 116

Awig-awig puniki kalinggihang ring Pura Desa, lugra katedunang yening wenten indik lintang mabuat pisan, sesampune ngaturang upakara sepatutipun.

Pawos 117

Sahananing panguger-uger, pararem, paswara sane sampun wenten, sadurung awig-awig puniki lumaksana, tur ring sajroning daging Awig-awig puniki dereng kaenterang, panguger-uger inucap kantun kaanggehang.

Pawos 118

Sakalwiring Awig-awig Banjar, Sekaa Taruna-Teruni lsp, ring Desa Adat Kapal, kapatut ninutin sadaging Awig-awig puniki, yening lempas sinanggeh sor. Sakalwiring sane durung kabawosang wyadin kaenterang ring sajroning Awig-awig puniki, pamarginya patut ninutin dresta kadulurin antuk pararem-pararem Desa.

Pawos 119

Yening wenten sajroning daging awig-awig puniki sane lempas ring U.U.D 1945, Undang-undang ; Peraturan Pemerintah lsp. saking sang mawangrat, Awig-awig puniki sinanggeh sor.

SARGA VIII  
PAMUPUT

Pawos 120

1. Awig-awig puniki kawastanin awig-awig Desa Adat Kapal.
2. Awig - awig puniki kamargiang ngawit kaingkupin utawi kararemin.

Pawos 121

1. Awig-awig puniki kasungkemin duk dina : Anggara Umanis, panglong 15, sasih Katiga, Isaka Warsha 1929, tanggal masehi 11 September 2007, ring Desa Adat Kapal.
2. Awig-awig puniki kalingga tanganin antuk Kelihan Desa Adat Kapal, kasarengin Kelihan-Kelihan Adat saha kasaksinin antuk Kepala Lingkungan miwah Lurah sawewidangan Desa, saha kakukuhang antuk Bupati Badung.
3. Lwir sang ngalingga tanganin :


ha. Para angga panyampurna Awig-Awig :

1. Kelihan Desa Adat Kapal,



I Ketut Sumertana

2. Patajuh Kelihan Desa,




Drs. I Made Suandi

3. Patajuh Kelihan Desa,


Ida Bagus Anom Jelawa

4. Penyarikan Desa Adat Kapal,




Ir. I Made Arnata, MT

5. Penyarikan Desa Adat Kapal,



Drh. I Gede Asrama, M. MA

6. Petengen Desa Adat Kapal,



Anak Agung Putu Yadnya

7. Petengen Desa Adat Kapal,



Ir. AA. Wiranata, MT

8. Manggala Kertha Sabha,



I Nyoman Udyana, SH

9. Manggala Upasabha Desa,



Ir. Ketut Kartadinata, MM

10. Panglingsir Desa,



Ketut Sudarsana

11. Panglingsir Desa,



I Made Poniti

na. Prajuru Adat :



2. Kelihan Br. Adat  
Panglan Delodan,  
Ir. Gd. Warvoka Advana



6. Kelihan Br. Adat  
Basangtamiang,  
Ida Bagus Surva Miasa, SE



11. Kelihan Br. Adat  
Pekon Delodan,  
I Gusti Ngurah Merta SPd.

12. Kelihan Br. Adat  
Langon,  
I Rai Ciptayasa

13. Kelihan Br. Adat  
Tambaksari,  
I Nyoman Sudirta

14. Kelihan Br. Adat  
Langon,  
I Rai Ciptayasa Astawa

15. Kelihan Br. Adat  
Mancan,  
I Ketut Santika


16. Kelihan Br. Adat  
Bekihang,  
I Nyoman Sudarsana

17. Kelihan Br. Adat  
Legalsat Baleran,  
I Putu Dharma

18. Kelihan Br. Adat  
Legalsat Delodan,  
I Wawan Kondra

Kelihan Desa Adat Kapal,  
I Ketut Sumertana

13. Kepala Lingkungan  
Muncan  
  
AA Ngurah Raka Jeladi

14. Kepala Lingkungan  
Gegadon  
  
I Made Sri Kadana

15. Kepala Lingkungan  
Belulang  
  
I Made Rai Sandiana

16. Kepala Lingkungan  
Tegalsaat,  
  
I Made Nada

Camat Mengwi,  
  
Luh Suryaniti, S.Sos.  
NIP. 010226423

Lurah Kapal,  
  
I Wawan Wiranata  
NIP. 600098959

ra. Bupati-Badung  
maks Murdhaning pamikukuh,  
  
Anak Agung Gde Agung, SH

Mengetahui dan telah dicatatkan :  
Tanggal :  
Reg. Nomor :  
Bupati : Badung